

Celebracion 60 aña trabou di biblioteca na Aruba : 1949-2009

AWE, diahuebs dia 20 di augustus tur empleado di biblioteca y algun invitado ta celebra "60 aña trabou di biblioteca". Ta recorda cu dia 20 augustus 1949 e portanan di e biblioteca publico a habri. Y cu esaki a marca e comienso oficial di e historia di trabou di biblioteca na Aruba.

A bai bon cu e prome biblioteca y na 1952 a habri un sucursal na San Nicolas. Y e sucursal a crece tambe bastante rapido. E prome bibliobus a subi caminda na 1968 pa bishita diferente scol riba nos isla. Gobierno Hulandes a pone fl. 30.000,- disponibel pa e bus cu un coleccion di 1800 buki. Desde e momento ey e bus tabata ofrece 10 scol y mas o menos 3 mil mucha buki pa lesa. Na 1980 tabata tin un cambio structural na biblioteca. A profesionalisa trabou di biblioteca mas cu ayudo di mas bibliotecaria. Na 1982 biblioteca a muda pa su edificio den G. Madurostraat y e nomber Leeszaal in Boekerij a cambia pa Biblioteca Publico Aruba. Seis aña despues, dia 3 di maart 1986 Biblioteca Publico Aruba a bira Biblioteca Nacional Aruba.

Biblioteca Nacional Aruba tin diferente meta y diariamente ta traha riba nan. Diferente estimulo a pone cu biblioteca a crece hunto cu e comunidad y paralel cu otro desaroyonan riba e isla.

Biblioteca a muda diferente biaha. Biblioteca tabata situa un tempo na Lagoenweg 11, despues pa hopi aña den Wilhelmminastraat, e coleccion di buki a bira mucho mas grandi y diverso cu mas coleccion special, a introduci logo nobo, empleadonan a bai y otro a bin den nan lugar, a amplia e funcion di un simpel punto di prestamo di buki pa un centro multifuncional. Hopi a cambia y biblioteca ta forma un parti importante di Aruba su historia social-cultural.

Asina a organisa exposicion,

actividad di promocion di lesamento, mercado di buki, programa vacacional pa mucha, Cine den aire liber, Luna Cultural y festival d buki di mucha. Por studia y traha riba tarea, ta organisa charla riba diferente topico, workshops, por bishita exposicion y sigui curso.

E desaroyonan di informacion digital ta exige di biblioteca cu e ta instrui su usuarionan y cu ta yuda usa informacion digital optimal. Tin un variedad di actividad social-cultural ta tuma lugar na biblioteca. Banda di tur e servicjonan cu biblioteca ta ofrece e comunidad Arubano e buki ta keda hunga un rol central.

Ultimo desaroyonan Departamento Arubiana, cas di entre otro e coleccion nacional a muda na december pa un espacio mas grandi den Bachstraat, no mucho leu for di e edificio principal den George Madurostraat. Despues cu Arubiana a muda, a adapta e espacio pa por studia. Sala Diamante ta uno multifuncional na unda por studia, pero tambe por usa e sala pa workshops, curso, conferencia etc.

E busnan a haya un otro 'look' yen di color alegre. Biblioteca ta den trayectoria pa cambia su sistema automatiza y a cumpra e pakete VSmart cu ta ofrece e usuario mas opcion pa busca informacion.

Celebracion

Servicio Postal ta presenta un serie di stampia special den cuadro di e celebracion '60 aña trabou di biblioteca'. Sr. Rudberth

Wolff ta e diseñador di e stampianan special aki, cu lo wordo presenta oficialmente diahuebs mainta. Tambe a organisa un bunita exposicion di Philatelie den Sala di actividad. Esaki ta habri pa publico durante orario regular di biblioteca.

A invita Gustave Nouel pa un exposicion di su obranan. Un exposicion individual retrospectivo. E exposicion aki ta dura 60 dia.

Empleadonan di biblioteca ta celebra '60 aña trabou di bib-



lioteca' pa cuminsa cu un santo sacrificio na misa di Dakota. Despues tin un desayuno. For di diez'or tin e programa oficial cu diferente orador. Na final di e mainta tin apertura di e exposicion di stampia. Tin mas actividad planea pa tuma lugar durante aña.

Miembronan cu tin buki na cas por entrega esakinan sin paga boete te fin di augustus 2009.

